

("Službene novine Kantona Sarajevo", broj 23/16), Vlada Kantona Sarajevo, na 106. sjednici održanoj 11.12.2025. godine, donijela je

ODLUKU
O USVAJANJU PLANA INTERVENTNIH MJERA U
SLUČAJEVIMA PREKOMJERNE ZAGAĐENOSTI
ZRAKA U KANTONU SARAJEVO

Član 1.

Usvaja se Plan interventnih mjera u slučajevima prekomjerne zagađenosti zraka u Kantonu Sarajevo, koji je sastavni dio ove odluke.

Član 2.

Ova odluka stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-56218-5/25
11. decembra 2025. godine
Sarajevo

Po ovlaštenju premijera
Ministrica
Darja Softić Kadenić, s. r.

Na osnovu člana 27. Zakona o zaštiti zraka ("Službene novine Federacije BiH", broj 72/24) i člana 41. Odluke o zaštiti i poboljšanju kvaliteta zraka u Kantonu Sarajevo ("Službene novine Kantona Sarajevo", broj 23/16), Vlada Kantona Sarajevo, na 106. sjednici održanoj 11.12.2025. godine, donijela je

PLAN
INTERVENTNIH MJERA U SLUČAJEVIMA
PREKOMJERNE ZAGAĐENOSTI ZRAKA U KANTONU
SARAJEVO

I. OPŠTE ODREDBE

- Plan interventnih mjera u slučajevima prekomjerne zagađenosti zraka u Kantonu Sarajevo (u daljnjem tekstu: Plan) donosi se za moguće posebne situacije u kojima su prekoračeni pragovi upozorenja i pragovi uzbune, čime mogu biti ugroženi zdravlje ljudi i okoliš.
- Planom se utvrđuju vrste rizika i opasnosti, postupak i mjere za uklanjanje opasnosti, subjekti zaduženi za primjenu mjera i odgovornost u vezi sa primjenom Plana.
- Područje Kantona Sarajevo u smislu provedbe Plana dijeli se na sljedeće zone:
 - Zona A: područja općina: Stari Grad, Centar, Novi Grad, Novo Sarajevo i Ilidža ispod 700 m.n.v.
 - Zona B: područje Općine Vogošća ispod 700 m.n.v.
 - Zona C: područje Općine Ilidža ispod 700 m.n.v.
 - Zona D: područje Općine Hadžići ispod 700 m.n.v.
 - Zona E: područja Kantona iznad 700 m.n.v. uključujući cjelokupno područje Općine Trnovo
- U ovom planu su u upotrebi pojmovi sa sljedećim značenjima:
 - Zona** - znači dio teritorije Kantona Sarajevo koji zbog specifičnih geografskih uslova i izvora zagađenja predstavlja posebnu cjelinu u smislu kvaliteta zraka i primjene mjera;
 - Zagađujuća materija** - znači bilo koja supstanca koju čovjek direktno ili indirektno unosi kroz zrak i koja samostalno ili udružena sa drugim materijama može imati štetan uticaj na ljudsko zdravlje i/ili na okoliš u cjelini, uključujući i neprijatne mirise;
 - Izmjerena vrijednost** - u Planu se koriste izmjerene vrijednosti izražene u $\mu\text{g}/\text{m}^3$ ili mg/m^3 ;
 - Granična vrijednost** - znači nivo određen na osnovu naučnog znanja s ciljem izbjegavanja, sprečavanja ili

smanjivanja štetnih uticaja na ljudsko zdravlje i/ili okoliš u cjelini; ovaj nivo se mora dostići u određenom periodu i kasnije ne smije biti prekoračen;

- **Prag upozorenja** - znači nivo iznad koga postoji rizik po ljudsko zdravlje usljed kratkog izlaganja za izuzetno osjetljive dijelove stanovništva i o kome je potrebno dati najnovije informacije;
- **Prag uzbune** - znači nivo iznad kojeg postoji rizik po ljudsko zdravlje prilikom kratkog izlaganja i na kojem će biti preduzeti direktni koraci;
- **Epizoda** je vremenski ograničen period trajanja povišenih koncentracija zagađujućih materija u zraku u Kantonu Sarajevo ("epizoda" je usvojeni međunarodni termin za označavanje posebnih situacija);
- **Referentne stanice** su stanice za mjerenje kvaliteta zraka koje odražavaju stanje kvaliteta zraka u prethodno definiranim zonama A, B, C i D. U slučaju da u određenoj zoni ne postoji automatska stanica za mjerenje kvaliteta zraka, za tu zonu se koriste rezultati monitoringa iz zone A, do uspostave automatskog monitoringa;
- **Čvrsta goriva** su razne vrste čvrstih materijala koje se koriste kao gorivo za grijanje i proizvodnju toplote, najčešće putem sagorijevanja (drvo, uglj, drveni uglj, treset, drveni pelet i sl.).

II. VRSTE RIZIKA I OPASNOSTI

- Koncentracija zagađujućih materija u zraku koja prelazi prag upozorenja ili prag uzbune, predstavlja potencijalnu opasnost za zdravlje ljudi, biljni i životinjski svijet i materijalna dobra, zbog čega može doći do posebnih situacija koje zahtijevaju mjere za njihovo prevazilaženje.
- Povećanje koncentracije zagađujućih materija u zraku je stanje zagađenosti atmosfere sa jednom ili više zagađujućih materija u takvim količinama i karakteristikama, koje nakon dužeg ili kraćeg izlaganja djeluju štetno na zdravlje ljudi, biljni i životinjski svijet i na materijalna dobra.
- Djelovanje prekomjernih koncentracija zagađujućih materija na organizam čovjeka može biti akutno i hronično. Akutno djelovanje podrazumijeva izlaganje organizma prekomjernih koncentracijama u kraćem vremenskom periodu, to jest "epizodama". Hronično djelovanje je izlaganje organizma manjim koncentracijama zagađujućih materija tokom dužeg vremenskog perioda.
- Glavni izvori zagađivanja zraka su saobraćaj, industrija, sistemi za zagrijavanje objekata individualnog i kolektivnog stanovanja, poslovnih i proizvodnih prostora.
- Glavne zagađujuće materije na koje sa odnosi ovaj plan su: sumpor dioksid, azot dioksid i oksidi azota, lebdeće/suspendovane čestice (PM10) i ugljen monoksid.
 - Sumpor dioksid** nastaje spaljivanjem goriva koji sadrže sumpor (ugalj, nafta, benzin, plin). Sumpor dioksid djeluje na disajne organe, moždani i probavni sistem;
 - Azotni oksidi** nastaju sagorijevanjem goriva na visokim temperaturama (benzin, nafta, plin), te imaju nadražajno dejstvo na sluznicu disajnih organa i oči. Uz ugljikovodike i ugljen monoksid mogu uzrokovati izrazito ozbiljne posljedice za život i zdravlje ljudi;
 - Lebdeće/suspendovane čestice (PM)** manje od $10\ \mu\text{m}$ nastaju nepotpunim sagorijevanjem goriva. Prodiru u dublje slojeve donjih disajnih puteva, dovode do

nadraživanja sluznice disajnih organa i očiju, promjena na koži, krvnom sistemu i sl. Pogoršavaju postojeće kardiovaskularne i plućne bolesti. Uz ostale štetne faktore mogu biti uzročnici novih oboljenja navedenih sistema (povišenog krvnog pritiska i nepravilnog rada srca, moždanog i srčanog udara, akutne upale disajnih puteva i pluća, hronične opstruktivne bolesti pluća, astme, karcinoma);

- d) **Ugljen monoksid** nastaje kao posljedica nepotpunog sagorijevanja fosilnih goriva. Može izazvati pospanost, dekoncentraciju, glavobolje, smetnje na mentalne sposobnosti čovjeka, oštećenje kardiovaskularnog sistema itd. Smanjuje zasićenost krvi kiseonikom i na taj način utiče na cijeli organizam.

III. SUBJEKTI ZADUŽENI ZA PRIMJENU PLANA

1. Subjekti zaduženi za primjenu Plana:

- 1.1. Vlada Kantona Sarajevo,
- 1.2. Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo,
- 1.3. Stručno tijelo za koordinaciju i nadzor Plana (u daljnjem tekstu: Stručno tijelo),
- 1.4. Ministarstvo zdravstva Kantona Sarajevo,
- 1.5. Ministarstvo unutrašnjih poslova Kantona Sarajevo,
- 1.6. Ministarstvo saobraćaja Kantona Sarajevo,
- 1.7. Ministarstvo za odgoj i obrazovanje Kantona Sarajevo,
- 1.8. Ministarstvo za nauku, visoko obrazovanje i mlade Kantona Sarajevo,
- 1.9. Ministarstvo kulture i sporta Kantona Sarajevo,
- 1.10. Ministarstvo privrede Kantona Sarajevo,
- 1.11. Općine u Kantonu Sarajevo,
- 1.12. Kantonalna uprava za inspekcijske poslove Kantona Sarajevo,
- 1.13. Kantonalna uprava civilne zaštite Kantona Sarajevo,
- 1.14. Služba za protokol i press Kantona Sarajevo,
- 1.15. Javna ustanova Zavod za javno zdravstvo Kantona Sarajevo,
- 1.16. Kantonalno javno komunalno preduzeće "Rad" d.o.o. Sarajevo,
- 1.17. Kantonalno javno komunalno preduzeće "Park" d.o.o. Sarajevo,
- 1.18. Kantonalno javno komunalno preduzeće "GRAS" d.o.o. Sarajevo i Centrotans d.d. Sarajevo,
- 1.19. Pravna i fizička lica, privredni subjekti i operatori emisije (postrojenja za sagorijevanje i tehnološka postrojenja), proizvođači toplotne energije, upravnici zajedničkih dijelova objekata kolektivnog stanovanja.

2. Obaveze subjekata zaduženih za primjenu Plana

2.1 Vlada Kantona Sarajevo

- Donosi Odluku o proglašenju/ukidanju epizode Uzbuna na prijedlog Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo,
- Nalaže provođenje mjera, te predlaže i/ili utvrđuje način obezbjeđenja sredstava za njihovo provođenje u toku trajanja epizode Uzbuna,
- Koordinira subjekte zadužene za primjenu Plana u toku trajanja epizode Uzbuna,
- U okviru svoje nadležnosti preduzima i druge mjere koje mogu doprinijeti efikasnijem provođenju Plana,

- Izuzetno od alineje 1 ove tačke, Vlada Kantona Sarajevo može donijeti Odluku da se pojedine mjere iz Plana ne primjenjuju.

2.2 Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo

- Imenuje Stručno tijelo i učestvuje u njegovom radu,
- Na osnovu Izvještaja Stručnog tijela, uzimajući u obzir i druge relevantne okolnosti, odlučuje o donošenju Naredbe o proglašenju/ukidanju epizode Upozorenje,
- Daje prijedlog Vladi Kantona Sarajevo za proglašenje epizode Uzbuna,
- Obezbeđuje sredstva u Budžetu Kantona potrebna za provođenja mjera iz Plana koje se odnose na javna komunalna preduzeća na nivou Kantona koji se bave komunalnom čistoćom, a ovisno od potreba i za druge subjekte primjene Plana, što se utvrđuje posebnim aktom,
- Vršiti koordinaciju sa subjektima zaduženim za provođenje mjera iz Plana, uključujući i upravnike zajedničkih dijelova objekata kolektivnog stanovanja,
- Na osnovu monitoringa provođenja mjera iz Plana priprema izvještaje i informacije za Vladu Kantona Sarajevo i Skupštinu Kantona Sarajevo,
- Obavještava subjekte nadležne za provedbu mjera iz Plana o proglašavanju/ukidanju epizoda zagađenosti zraka u Kantona Sarajevo,
- Formira Listu operatora emisija (postrojenja za sagorijevanje i tehnološka postrojenja) koji su obveznici primjene mjera iz Plana u saradnji sa inspekcijom i općinama,
- Predlaže i preduzima i druge mjere koje mogu doprinijeti efikasnijem provođenju Plana.

2.3. Stručno tijelo

- Imenuje ga Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo, a čine ga predstavnici Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo, Zavoda za javno zdravstvo Kantona Sarajevo, Federalnog hidrometeorološkog zavoda Bosne i Hercegovine i stručna lica iz oblasti zaštite zraka,
- Svakodnevno (uključujući vikende i praznike) prati stanje kvaliteta zraka, utvrđuje uslove za proglašenje epizoda,
- Priprema Izvještaj Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo sa prijedlogom za proglašenje/ukidanje epizoda prekomjerne zagađenosti zraka,
- Procjenjuje mogući scenarij trajanja epizoda povišenih koncentracija zagađujućih materija u zraku na osnovu raspoloživih meteoroloških informacija i prognoza Federalnog hidrometeorološkog zavoda Bosne i Hercegovine, kao i drugih relevantnih izvora,
- Podnosi zbirni izvještaj o radu za proteklu sezonu primjene Plana Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo najkasnije u roku od 15 dana od dana završetka rada, koji treba da sadrži, između ostalog, ocjenu provedenih mjera, uočene probleme u radu Stručnog tijela i primjeni Plana, preporuke za poboljšanje, i sl.,
- Predlaže mjere i aktivnosti za koje procjeni da mogu imati pozitivan uticaj na stanje kvaliteta zraka u Kantonu Sarajevo.

2.4. Ministarstvo zdravstva Kantona Sarajevo

- U sklopu svoje nadležnosti, u toku trajanja epizoda iz Plana vrši intenzivnu koordinaciju sa zdravstvenim ustanovama radi praćenja negativnog uticaja zagađenog zraka na zdravlje stanovništva,
- Izdaje preporuke za uslove rada i zaštitu radnika na otvorenom u toku trajanja epizoda,
- Upućuje zahtjev nadležnim policijskim organima za zabranu okupljanja na otvorenom radi sprečavanja ugrožavanja zdravlja ljudi, u skladu sa Zakonom o javnom okupljanju Kantona Sarajevo,
- U sklopu svoje nadležnosti, daje preporuke vezane za održavanje nastave, radnog vremena itd.,
- Imenuje osobu za kontinuirani prijem obavještenja o proglašenju/ukidanju epizoda, te kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo odmah po imenovanju,
- Organizuje primjenu mjera iz epizoda Plana i van radnog vremena, tokom vikenda i praznika,
- Preduzima i druge mjere iz nadležnosti Ministarstva koje mogu doprinijeti efikasnijem provođenju Plana.

2.5. Ministarstvo unutrašnjih poslova Kantona Sarajevo

- Obezbjeduje sredstva u Budžetu Kantona potrebna za provođenje mjera iz Plana iz svoje nadležnosti,
- Obezbjeduje postupanje inspekcije zaštite od požara u skladu sa Odlukom o zaštiti i poboljšanju kvaliteta zraka u Kantonu Sarajevo,
- Ostvaruje saradnju sa Kantonalnom upravom za inspekcijske poslove Kantona Sarajevo, Ministarstvom saobraćaja, kao i sa drugim subjektima primjene Plana,
- Priprema/ažurira protokol o svom djelovanju kojeg dostavlja na uvid Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo radi praćenja implementacije Plana,
- Imenuje osobu za kontinuirani prijem i prosljeđivanje obavještenja o proglašenju/ukidanju epizoda, koja će tokom trajanja epizoda svakodnevno davati informacije Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo o preduzetim mjerama iz nadležnosti Ministarstva. Odmah po imenovanju, kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo,
- Organizuje primjenu mjera iz epizoda Plana i van radnog vremena, tokom vikenda i praznika,
- Preduzima i druge mjere iz nadležnosti Ministarstva koje mogu doprinijeti efikasnijem provođenju Plana.

2.6. Ministarstvo saobraćaja Kantona Sarajevo

- Obezbjeduje sredstva u Budžetu Kantona potrebna za provedenja mjera iz Plana koje se odnose na Kantonalno javno komunalno preduzeće "GRAS" d.o.o. Sarajevo i Centrottrans d.d. Sarajevo, a ovisno od potreba i za finansiranje drugih organizacija,
- Ostvaruje saradnju sa Kantonalnom upravom za inspekcijske poslove Kantona Sarajevo, Ministarstvom unutrašnjih poslova Kantona Sarajevo i Ministarstvom komunalne privrede, infrastrukture, prostornog uređenja, građenja i zaštite okoliša Kantona Sarajevo,

- Izdaje dozvole potrebne za realizaciju mjera propisanih Planom iz segmenta saobraćaja,
- Imenuje osobu za kontinuirani prijem obavještenja o proglašenju/ukidanju epizoda. Odmah po imenovanju, kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo,
- Organizuje primjenu mjera iz epizoda Plana i van radnog vremena, tokom vikenda i praznika,
- Preduzima i druge mjere iz nadležnosti Ministarstva koje mogu doprinijeti efikasnijem provođenju Plana.

2.7. Ministarstvo za odgoj i obrazovanje Kantona Sarajevo

- Odgovorno je za primjenu mjera iz Plana koje se odnose na organizovanje i odvijanje nastavnog procesa u ustanovama iz svoje nadležnosti,
- Imenuje osobu za kontinuirani prijem i prosljeđivanje obavještenja o proglašenju/ukidanju epizoda, te kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo odmah po imenovanju,
- Organizuje primjenu mjera iz epizoda Plana i van radnog vremena, tokom vikenda i praznika.

2.8. Ministarstvo za nauku, visoko obrazovanje i mlade Kantona Sarajevo

- Odgovorno je za primjenu mjera iz Plana koje se odnose na organizovanje i odvijanje nastavnog procesa u ustanovama iz svoje nadležnosti,
- Imenuje osobu za kontinuirani prijem i prosljeđivanje obavještenja o proglašenju/ukidanju epizoda, te kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo odmah po imenovanju,
- Organizuje primjenu mjera iz epizoda Plana i van radnog vremena, tokom vikenda i praznika.

2.9. Ministarstvo kulture i sporta Kantona Sarajevo

- Odgovorno je za primjenu mjera iz Plana koje se odnose na organizovanje kulturnih i sportskih događaja na otvorenom prostoru u toku trajanja epizoda,
- Imenuje osobu za kontinuirani prijem i prosljeđivanje obavještenja o proglašenju/ukidanju epizoda, te kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo odmah po imenovanju,
- Organizuje primjenu mjera iz epizoda Plana i van radnog vremena, tokom vikenda i praznika.

2.10. Ministarstvo privrede Kantona Sarajevo

- Prati provedbu Plana u poslovnim subjektima kojima je resorno ovo Ministarstvo,
- Imenuje osobu za kontinuirani prijem obavještenja o proglašenju/ukidanju epizoda, te kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo odmah po imenovanju,
- Preduzima druge mjere iz svoje nadležnosti koje mogu doprinijeti efikasnijem provođenju Plana.

2.11. Općine u Kantonu Sarajevo

- Odgovorne su za zaštitu i poboljšanje kvaliteta zraka u skladu sa Zakonom o zaštiti zraka Federacije BiH i podzakonskim propisima iz oblasti zaštite zraka,

- Imenuju Operativni tim za primjenu Plana, koji će činiti načelnik i operativna lica, pripremaju/ažuriraju protokol o načinu ostvarivanja saradnje sa drugim subjektima primjene Plana kojeg dostavljaju na uvid Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo radi praćenja implementacije Plana,
- Operativni tim vodi ažurnu evidenciju o operatorima emisija (postojećim i novim) koji koriste čvrsta i tečna goriva (postrojenja za sagorijevanje i tehnološka postrojenja), koja uključuje sljedeće podatke: naziv, vrsta postrojenja, adresa, mail, telefon, korišteno gorivo, alternativno gorivo i emisioni ispusti, a koju najdalje do 31.12. tekuće godine dostavljaju Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo u cilju ažuriranja Liste operatora emisije,
- Imenuju osobu iz Operativnog tima zaduženu za kontinuirani prijem i prosljeđivanje obavještenja o proglašenju/ukidanju epizoda, koja će tokom trajanja epizoda svakodnevno davati informacije Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo o preduzetim mjerama iz nadležnosti općine. Odmah po imenovanju, kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo,
- Organizuju primjenu mjera iz epizoda Plana i van radnog vremena, tokom vikenda i praznika,
- Obezbeđuju sredstva u budžetu potrebna za funkcionisanje Operativnog tima, kao i za druge aktivnosti utvrđene ovim Planom koje provode putem općinskih komunalnih preduzeća,
- Prilikom ugovaranja zimskog održavanja saobraćajnica, općine koje ovu aktivnost obezbeđuju putem drugih pravnih lica (Ilić, Hadžić, Vogošća i Ilijaš) dužne su predvidjeti i blagovremeno uklanjanje posipne frakcije sa tretiranih površina,
- U okviru svojih nadležnosti intenziviraju inspeksijski nadzor u slučajevima proglašenja epizoda iz Plana,
- Obavješćavaju subjekte sa Liste operatora emisije na koja se odnosi Plan o proglašenju/ukidanju epizoda iz Plana, putem e-mail-a, telefona, ili na drugi način,
- Preduzimaju i druge mjere iz svoje nadležnosti koje mogu doprinijeti efikasnijem provođenju Plana.

2.12. Kantonalna uprava za inspeksijske poslove Kantona Sarajevo

- Obezbeđuje efikasno vršenje nadzora nad subjektima odgovornim za provođenje mjera utvrđenih Planom,
- Vršiti nadzor nad provođenjem mjera iz Plana, kroz djelovanje inspekcije zaštite okoliša, urbanističko-građevinske, komunalne, tehničke i saobraćajne inspekcije, inspekcije za sport, inspekcije zaštite na radu i drugih inspekcija,
- Priprema/ažurira protokol saradnje između inspekcija iz svoje nadležnosti, te dostavlja na uvid Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo radi praćenja implementacije Plana,
- Koordinira aktivnosti sa ostalim inspeksijskim službama na federalnom i općinskom nivou, te drugim službama i komunalnim redarima u cilju kontrole izvršavanja mjera iz Plana,

- Ostvaruje saradnju sa inspekcijom zaštite od požara u slučaju sumnje na korištenje energenata ili otpadnih materija koji nisu dozvoljeni važećim propisima, a u skladu sa odredbama Odluke o zaštiti i poboljšanju kvaliteta zraka u Kantonu Sarajevo,
- Dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo informaciju o poduzetim preventivnim i kontinuiranim mjerama, te mjerama tokom trajanja epizoda iz Plana,
- Imenuje osobu za kontinuirani prijem i prosljeđivanje obavještenja o proglašenju/ukidanju epizoda, koja će tokom trajanja epizoda svakodnevno davati informacije Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo o preduzetim mjerama iz nadležnosti Uprave. Odmah po imenovanju, kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo,
- Organizuje primjenu mjera iz epizoda Plana i van radnog vremena, tokom vikenda i praznika,
- Preduzima i druge mjere iz svoje nadležnosti koje mogu doprinijeti efikasnijem provođenju Plana.

2.13. Kantonalna uprava civilne zaštite Kantona Sarajevo

- Zaprima dojave građana o kršenju odredbi iz Plana, na telefonski broj 121 Kantonalnog operativnog centra civilne zaštite.

2.14. Služba za protokol i press Kantona Sarajevo

- Obavješćava sredstva javnog informisanja i građane o proglašavanju/ukidanju epizoda zagađenosti zraka u Kantonu Sarajevo,
- Izdaje saopćenja koja se odnose na stanje kvaliteta zraka i primjenu Plana.

2.15. Javna ustanova Zavod za javno zdravstvo Kantona Sarajevo

- Učestvuje u radu Stručnog tijela za koordinaciju i nadzor u dijelu monitoringa kvaliteta zraka i izvještavanja o stanju kvaliteta zraka prema drugim članovima Stručnog tijela i Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo,
- U periodu primjene Plana svakodnevno dostavlja izvještaje o koncentracijama zagađujućih materija u zraku Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo, daje informacije medijima o stanju kvaliteta zraka i zdravstvene preporuke za stanovništvo,
- U slučaju prekoračenja koncentracija zagađujućih materija u zraku ili koncentracija pojedine zagađujuće materije opasne po zdravlje ljudi, vrši obavješćavanje javnosti putem radija, televizije, dnevnih novina, interneta i/ili na drugi način,
- Preduzima i druge mjere koje mogu doprinijeti zaštiti zdravlja građana.

2.16. Kantonalno javno komunalno preduzeće "Rad" d.o.o. Sarajevo

- Preduzima mjere utvrđene Planom za koje sredstva obezbeđuje Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo,

- Izrađuje Operativni plan realizacije kontinuiranih mjera za sprečavanje zagađenja u zimskoj sezoni i realizacije mjera tokom trajanja epizoda prekomjernog zagađenja zraka, te ga dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo na odobravanje i finansiranje predviđenih aktivnosti,
- Blagovremeno uklanja posipnu frakciju korištenu u sklopu zimskog održavanja saobraćajnica,
- Koordinira rad između komunalnih redara i Kantonalne uprave za inspeksijske poslove u cilju provedbe mjera iz Plana,
- Dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo informaciju o poduzetim kontinuiranim mjerama, te mjerama tokom trajanja epizoda iz Plana,
- Imenuje osobu za kontinuirani prijem obavještenja o proglašenju/ukidanju epizoda, koja će tokom trajanja epizoda svakodnevno davati informacije Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo o preduzetim mjerama iz nadležnosti preduzeća. Odmah po imenovanju, kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo,
- Organizuje primjenu mjera iz epizoda Plana i van radnog vremena, tokom vikenda i praznika,
- Preduzima i druge mjere iz svoje nadležnosti koje mogu doprinijeti smanjenju koncentracija zagađujućih materija na području Kantona Sarajevo.

2.17. Kantonalno javno komunalno preduzeće "Park" d.o.o. Sarajevo

- Intenzivira aktivnosti preduzeća na čišćenju javnih površina u smislu Zakona o komunalnoj čistoći,
- Uključuje komunalne redare i ostvaruje saradnju sa Kantonalnom upravom za inspeksijske poslove Kantona Sarajevo u cilju provedbe mjera iz Plana,
- Imenuje osobu za kontinuirani prijem obavještenja o proglašenju/ukidanju epizoda, te kontakt podatke dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo odmah po imenovanju,
- Organizuje primjenu mjera iz epizoda Plana i van radnog vremena, tokom vikenda i praznika,
- Preduzima i druge mjere koje mogu doprinijeti smanjenju koncentracija zagađujućih materija na području Kantona Sarajevo, u okviru svoje nadležnosti.

2.18. Kantonalno javno komunalno preduzeće "Gras" d.o.o. Sarajevo i Centrottrans d.d. Sarajevo

- Obezbeđuju povećanje kapaciteta sredstava javnog gradskog prevoza koji ne zagađuju okoliš,
- Preduzimaju i druge mjere iz svoje nadležnosti koje mogu doprinijeti smanjenju koncentracija zagađujućih materija na području Kantona Sarajevo, za što se sredstva obezbjeđuju u skladu sa ovim Planom,
- Imenuju osobu za kontinuirani prijem obavještenja o proglašenju/ukidanju epizoda. Odmah po imenovanju, kontakt podatke dostavljaju Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo.

2.19. Pravna i fizička lica, privredni subjekti i operatori emisije (postrojenja za sagorijevanje i tehnološka postrojenja), proizvođači toplotne energije, upravnici zajedničkih dijelova objekata kolektivnog stanovanja

- Odgovorni su za zaštitu i poboljšanje kvaliteta zraka u skladu sa Zakonom o zaštiti zraka Federacije BiH, podzakonskim propisima iz oblasti zaštite zraka, te drugim propisima koji regulišu materiju u vezi sa ovim Planom
- Odgovorni su za primjenu Plana, kao i za preduzimanje svih potrebnih, tehnički izvodljivih mjera kako bi smanjili emisije u zrak, uključujući redovno održavanje kotlovskih postrojenja, čišćenje dimovodnih instalacija, održavanje filterskih postrojenja, te sve druge mjere u cilju obezbjeđenja ispravnog funkcionisanja pogona, postrojenja i procesa koji imaju emisije u zrak,
- Operatori emisije koji koriste čvrsta i tečna goriva (postrojenja za sagorijevanje i tehnološka postrojenja) dužni su dostaviti podatke (općina, naziv, vrsta postrojenja, adresa, mail, telefon, korišteno gorivo, alternativno gorivo, emisioni ispusti) Operativnom timu nadležne općine u cilju formiranja/ažuriranja Liste operatora emisije, a koja će dalje biti dostavljena Ministarstvu,
- Dostavljaju nadležnom općinskom Operativnom timu informaciju o poduzetim preventivnim mjerama, te mjerama tokom trajanja epizoda iz Plana,
- Imenuju osobu za kontinuirani prijem obavještenja o proglašenju/ukidanju epizoda, koja će tokom trajanja epizoda svakodnevno davati informacije nadležnom općinskom Operativnom timu o preduzetim mjerama. Odmah po imenovanju kontakt podatke dostavljaju Operativnom timu.

IV. PREVENTIVNE MJERE ZA SPREČAVANJE ZAGAĐENJA U ZIMSKOJ SEZONI

U cilju poboljšanja kvaliteta zraka prije početka grejne sezone, Planom se propisuju sljedeće preventivne mjere:

Tabela 1. Preventivne mjere

R. br.	Mjera/aktivnost	Nosilac mjere/aktivnosti	Praćenje provođenja mjere/aktivnosti
1.	Obavezno preduzimanje svih potrebnih, tehnički izvodljivih mjera, kako bi se smanjile emisije u zrak, uključujući redovno održavanje kotlovskih postrojenja i korištenje goriva koji zadovoljavaju standarde goriva	Operatori emisije (postrojenja za sagorijevanje i tehnološka postrojenja)	Kantonalna uprava za inspeksijske poslove Kantona Sarajevo (tehnička inspekcija i inspekcija zaštite okoliša)
2.	Obavezan pregled i čišćenje dimovodnih objekata i dostava zapisnika o izvršenju ove obaveze nadležnoj inspekciji, u skladu sa Odlukom o zaštiti i poboljšanju kvaliteta zraka u Kantonu Sarajevo, najkasnije u roku od 15 dana od obavljenog pregleda	Operatori postrojenja za sagorijevanje i upravnici zajedničkih dijelova objekata kolektivnog stanovanja	Ministarstvo unutrašnjih poslova Kantona Sarajevo - protivpožarna inspekcija
3.	Davati preporuke svim subjektima da, neposredno prije zimske sezone, organizuju akcije i informiraju građane u pripremi vozila u smislu pregleda filtera, kočionijskih sistema, te provjere sistema za sagorijevanje i ispušt plinova	- Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo - Služba za protokol i press Kantona Sarajevo	
4.	Vršiti kontrolu operatora emisija (postrojenja za sagorijevanje) u	Kantonalna uprava za inspeksijske	

	u smislu skladištenja čvrstih goriva na zakonski propisani način	poslove Kantona Sarajevo - inspekcija zaštite okoliša	
5.	Vršiti kontrolu skladišta čvrstih goriva u smislu zaštite od atmosferskih uticaja radi obezbjeđenja kvaliteta goriva i time smanjenja emisija	Kantonalna uprava za inspeksijske poslove Kantona Sarajevo - tržišna inspekcija	

V. KONTINUIRANE MJERE ZA SPREČAVANJE ZAGAĐENJA U ZIMSKOJ SEZONI

U cilju poboljšanja stanja kvaliteta zraka, Planom se propisuju kontinuirane mjere koje je potrebno provoditi u periodu od 15.10. tekuće do 15.04. naredne godine.

Tabela 2. Kontinuirane mjere

R. br.	Mjera/aktivnost	Nosilac mjere/aktivnosti	Praćenje provođenja mjere/aktivnosti
1.	Obavezno intenzivirati pranje i čišćenje saobraćajnica (u zavisnosti od vremenskih uslova) u cilju sprečavanja podizanja čvrstih čestica u zrak, u skladu sa Operativnim planom iz Poglavlja III Plana tačka 2.16. alineja 2.	Kantonalno javno komunalno preduzeće "Rad" d.o.o. Sarajevo i ostala komunalna preduzeća	- Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo - Općine
2.	Upozoravati da je kašnjenje svako spaljivanje otpada u kućnim ložištima i kotlovnica	Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo	
3.	Upućivati apele stanovništvu da smanji broj vozila u saobraćaju korištenjem jednog vozila za više osoba	- Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo, - Služba za protokol i press Kantona Sarajevo	
4.	Upozoravati građane koji koriste čvrste energente za zagrijavanje prostora da je kašnjenje odlaganje vrelog pepela u kontejnere za komunalni otpad	Kantonalno javno komunalno preduzeće "Rad" d.o.o. Sarajevo	Služba komunalnih redara
5.	Vršiti kontrolu paljenja vatre i spaljivanja otpada na otvorenom	- Kantonalno javno komunalno preduzeće "Rad" d.o.o. Sarajevo - Služba komunalnih redara - Općine (općinska komunalna inspekcija)	
6.	Vršiti kontrolu poštivanja zabrane spaljivanja otpada u postrojenjima za sagorijevanje za koja nije izdato odobrenje u skladu sa važećim propisima	Kantonalna uprava za inspeksijske poslove Kantona Sarajevo - inspekcija zaštite okoliša	
7.	Provoditi kampanju obavještanja i edukacije s ciljem jačanja svijesti o uticaju na kvalitet zraka	- Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo - Služba za protokol i press Kantona Sarajevo	

VI. POSTUPAK PROGlašENJA EPIZODA I MJERE ZA SMANJENJE PREKOMJERNE ZAGAĐENOSTI ZRAKA

Epizode povećanih koncentracija zagađujućih materija u zraku Kantona Sarajevo su Upozorenje i Uzbuna.

Epizode se proglašavaju na osnovu izmjerenih ili proračunatih prosječnih vrijednosti koncentracija zagađujućih materija u zraku, konstatovanih na području Kantona, a u skladu sa graničnim vrijednostima kvaliteta zraka, pragovima upozorenja i pragovima uzbune datim u članu 15. i 20. Pravilnika o načinu vršenja monitoringa kvaliteta zraka i definisanju vrsta zagađujućih materija, graničnih vrijednosti i drugih standarda kvaliteta zraka ("Službene novine Federacije BiH", broj: 1/12, 50/19 i 3/21). Epizode se mogu proglasiti na području jedne ili više zona iz Poglavlja I, tačke 3. ovog plana.

Mjere iz ovog Plana se ne provode na području Zone E: područja Kantona iznad 700 m.n.v. uključujući cjelokupno područje Općine Trnovo.

Prestanak primjene mjera po epizodama vrši se na isti način kao i kod njihovog proglašavanja.

1. EPIZODA "UPOZORENJE"

Epizodu "Upozorenje" proglašava/ukida Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo, na osnovu Izvještaja Stručnog tijela, ako su ispunjeni sljedeći uslovi:

- na području Kantona se uspostavila stabilna vremenska situacija, koju karakteriše sporo kretanje visokog atmosferskog pritiska, slab vjetar i/ili prizemna temperatura inverzija u kotlinskim dijelovima Kantona,
- ako se u narednih 48 sati očekuje stabilna vremenska situacija, koja pogoduje daljnjem akumuliranju zagađujućih materija u zraku,
- ako izmjerene koncentracije jedne ili više zagađujućih materija u zraku na najmanje jednoj referentnoj stanici u Zoni, u skladu sa Poglavljem I, tačkom 3. ovog plana, su jednake ili prelaze prag Upozorenja (Tabela 3).

Izuzetno, Stručno tijelo može dati prijedlog za ukidanje epizode "Upozorenje", ako je došlo do značajnog poboljšanja kvaliteta zraka usljed promjene vremenskih prilika u pojedinim zonama.

Tabela 3. Pragovi Upozorenja

Zagađujuća materija	Period usrednjavanja	Prag upozorenja (µg/m ³)
SO ₂	1 h	400 (napomena 1)
NO ₂	1 h	250 (napomena 1)
PM ₁₀	24 h	90 (napomena 2)
CO	8h	12.000
CO	24h	7.500

Napomena 1: Vrijednosti moraju biti prekoračene najmanje tri uzastopna sata

Napomena 2: Vrijednosti moraju biti prekoračene kao 24-časovni prosjek za prethodni dan

Stručno tijelo, po uspostavljanju uslova za proglašanje/ukidanje epizode "Upozorenje" u najkraćem mogućem roku dostavlja Izvještaj Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo, u kojem su navedeni razlozi za proglašanje/ukidanje epizode i zone u kojima se proglašava/ukida epizoda.

Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo je dužno u najkraćem roku obavijestiti sve subjekte primjene Plana o

proglašenju/ukidanju epizode, izuzev operatore emisije sa Liste (postrojenja za sagorijevanje i tehnološka postrojenja), koje obavještavaju općine na čijoj teritoriji djeluju.

U dane vikenda i praznika, epizoda "Upozorenje" se proglašava/ukida na osnovu izvještaja Stručnog tijela, uz usmenu saglasnost Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo.

U slučaju proglašenja epizode "Upozorenje" obavezno se primjenjuju mjere i aktivnosti navedene u tabelama 4. i 5.

Tabela 4. Mjere/aktivnosti i odgovornosti primjene u slučaju epizode UPOZORENJE u cilju smanjenja emisija

R. br.	Mjera/aktivnost	Nosilac mjere/aktivnosti	Subjekti praćenja provođenja mjere/aktivnosti	Uslovi za provođenje mjere/aktivnosti
1.	Osigurati da sva postrojenja za proizvodnju toplotne energije snage preko 50 kW koja koriste čvrsta i tečna goriva smanje temperaturu u prostorijama koje zagrijavaju za minimalno 2°C	- Proizvođač toplotne energije u smislu Uredbe o opštim uslovima za proizvodnju, isporuku i korištenje toplotne energije - Operatori postrojenja za sagorijevanje	Kantonalna uprava za inspekcijske poslove Kantona Sarajevo	
2.	Intenzivirati pranje i čišćenje cesta ukoliko vremenski uslovi dozvoljavaju, te u slučaju niskih temperatura primijeniti "mokri postupak" sa otopinom za obaranje koncentracije čestica u zrak na svim glavnim gradskim saobraćajnicama, regionalnim i magistralnim cestama, te na najmanje 40% najprometnijih lokalnih cesta	Kantonalno javno komunalno preduzeće "Rad" d.o.o. Sarajevo	Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo	Osiguranje dovoljno finansijskih sredstava u budžetu
3.	Intenzivirati nadzor nad tehničkom ispravnosti vozila sa stanovišta sumnje na prekomjerno zagađivanje okoliša shodno Pravilniku o tehničkim pregledima vozila ("Službeni glasnik BiH", broj: 33/19)	Ministarstvo unutrašnjih poslova Kantona Sarajevo		Osiguranje dovoljno finansijskih sredstava u budžetu za slučajeve kada se na vanrednom tehničkom pregledu ne dokaže opravdanost sumnje na prekomjerno zagađivanje zraka
4.	Zabraniti izvođenje građevinskih radova na otvorenom prostoru koji produkuju emisiju lebdećih čestica u zrak	Pravna i fizička lica	Kantonalna i općinska urbanističko-građevinska inspekcija	

5.	Zabraniti saobraćaj za teretna motorna vozila čija je najveća dozvoljena masa preko 3,5 tone na glavnom gradskom longitudinalnom pravcu na potezu od Bašaršije do Nedžarića, sa preusmjerenjem saobraćaja na alternativne pravce kretanja. Napomena: Ovo se ne odnosi na vozila javnog gradskog prevoza, javnih komunalnih preduzeća, vozila hitnih intervencija i dostavna vozila za prehrambene proizvode.	Pravna i fizička lica	- Ministarstvo saobraćaja Kantona Sarajevo - Ministarstvo unutrašnjih poslova Kantona Sarajevo - Kantonalna uprava za inspekcijske poslove Kantona Sarajevo - saobraćajna inspekcija	Tehnička regulacija saobraćaja za vrijeme zabrana vršit će se privremenom saobraćajnom signalizacijom ili opremom, znacima i naredbama koje daju ovlaštena policijska lica Ministarstva unutrašnjih poslova Kantona Sarajevo
6.	Zabraniti kretanja u zoni A automobila i teretnih vozila, čiji motori imaju normu EURO2 ili manju. Napomena: Ovo se ne odnosi na vozila policije, inspekcije, javnog gradskog prevoza, javnih komunalnih preduzeća, vozila pravnih lica koja za potrebe komunalnih preduzeća izvode radove na hitnim intervencijama, vozila invalidnih lica i vozila hitnih intervencija (civilne zaštite, hitne pomoći, vatrogasaca)	Pravna i fizička lica	- Ministarstvo unutrašnjih poslova Kantona Sarajevo	
7.	Osigurati protok motornih vozila bez dužeg zadržavanja na glavnim gradskim saobraćajnicama	Ministarstvo unutrašnjih poslova Kantona Sarajevo		
8.	Izvršiti, u zavisnosti od mogućnosti, pomjeranje početka radnog vremena u cilju rasterećenja kapaciteta javnog gradskog prevoza i gradskih saobraćajnica	Organi uprave, javne institucije i organizacije, poslovni i privredni subjekti		

Tabela 5. Mjere/aktivnosti i odgovornosti primjene u slučaju epizode UPOZORENJE u cilju zaštite zdravlja stanovništva

R.br.	Mjera/aktivnost	Nosilac mjere/aktivnosti	Subjekti praćenja provođenja mjere/aktivnosti	Uslovi za provođenje mjere/aktivnosti
1.	Zabraniti boravak djece na otvorenom prostoru van školske zgrade za vrijeme velikih i malih odmora, te odvijanje časova tjelesnog odgoja u dvorištu škola	Ustanove školskog i predškolskog odgoja i obrazovanja	Ministarstvo za odgoj i obrazovanje Kantona Sarajevo	
2.	Osigurati zaštitu radnika koji rade na otvorenom prostoru (poštari, policajci, komunalni radnici i dr.)* * Prema preporuci Zavoda za javno zdravstvo osnovnu zaštitu predstavlja maska tip N95 ili FFP2 ili FFP3	Pravna lica	Kantonalna uprava za inspekcijske poslove Kantona Sarajevo - inspekcija zaštite na radu	

3.	Upozoravati rizične grupe stanovništva na smanjenje kretanja i boravka na otvorenom	Zavod za javno zdravstvo Kantona Sarajevo Služba za protokol i press Kantona Sarajevo		
----	---	--	--	--

2. EPIZODA "Uzbuna"

Epizodu "Uzbuna" proglašava/ukida posebnim aktom Vlada Kantona Sarajevo na prijedlog Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo zasnovanom na izvještaju Stručnog tijela, ako su ispunjeni sljedeći uslovi:

- izmjerene koncentracije jedne ili više zagađujućih materija u zraku na najmanje jednoj referentnoj stanici u Zoni u skladu sa Poglavljem I, tačkom 3. ovog Plana, su jednake ili prelaze prag Uzbune (Tabela 6),
- ako se u narednih 48 sati očekuje stabilna vremenska situacija koja pogoduje daljnjem akumuliranju zagađujućih materija u zraku.

Izuzetno, Stručno tijelo može dati prijedlog za ukidanje epizode "Uzbuna", ako je došlo do značajnog poboljšanja kvaliteta zraka usljed promjene vremenskih prilika u pojedinim zonama.

Tabela 6. Pragovi Uzbune

Zagađujuća materija	Period usrednjavanja	Prag uzbune (µg/m ³)
SO ₂	1 h	500 (napomena 1)
NO ₂	1 h	400 (napomena 1)
PM ₁₀	24 h	200 (napomena 2)
CO	8h	15.000
CO	24h	10.000

Napomena 1: Vrijednosti moraju biti prekoračene najmanje tri uzastopna sata

Napomena 2: Vrijednosti moraju biti prekoračene kao 24-časovni prosjek za prethodni dan

Stručno tijelo, po uspostavljanju uslova za proglašenje/ukidanje epizode "Uzbuna" u najkraćem mogućem roku dostavlja Izvještaj Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo, koje isti dostavlja Vladi Kantona Sarajevo na odlučivanje. U Izvještaju su navedeni razlozi za proglašenje/ukidanje epizode i zone u kojima se proglašava/ukida epizoda.

Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo dužno je, odmah nakon donošenja odluke Vlade, o proglašenju/ukidanju epizode "Uzbuna" obavijestiti sve subjekte primjene Plana, izuzev operatore emisije sa Liste (postrojenja za sagorijevanje i tehnološka postrojenja) koje obavještavaju općine na čijoj teritoriji djeluju.

U slučaju da preduzete mjere zabrane i ograničenja u roku od narednih 48 sati ne obezbijede smanjenje koncentracija zagađujućih materija u zraku na osnovu kojih je proglašena Uzbuna, odnosno trend koncentracije zagađujućih materija u zraku je i dalje u porastu, tada Vlada Kantona Sarajevo može preduzeti i dodatne mjere smanjenja emisija.

U slučaju proglašenja epizode "Uzbuna" obavezno se, uz mjere i aktivnosti iz tabela 4. i 5. primjenjuju i mjere i aktivnosti navedene u tabelama 7. i 8.

Tabela 7. Mjere/aktivnosti i odgovornosti primjene u slučaju epizode UZBUNA u cilju smanjenja emisija

R. br.	Mjera	Nosilac mjere/aktivnosti	Subjekti praćenja provođenja mjere/aktivnosti	Uslovi za provođenje mjere/aktivnosti
1.	Zabraniti kretanje u zoni A automobila i teretnih vozila čiji motori imaju normu EURO3 i manju. Napomena: Ovo se ne odnosi na vozila policije, inspekcije, ministarstva odbrane, javnog gradskog prevoza, javnih komunalnih preduzeća, vozila pravnih lica koja za potrebe komunalnih preduzeća izvode radove na hitnim intervencijama, vozila sa diplomatskim tablicama, vozila invalidnih lica, taxi vozila i vozila hitnih intervencija (civilne zaštite, hitne pomoći, vatrogasaca).	Pravna i fizička lica	Ministarstvo unutrašnjih poslova Kantona Sarajevo	Osiguranje dovoljno finansijskih sredstava u budžetu
2.	- Prolongirati početak nastave u osnovnim i srednjim školama, umjesto u 8:00 sati u 8:30 - Prolongirati dolazak djece u vrtić, umjesto do 8:00 sati do 09:00 - Skratiti časove u obje smjene (po 10 minuta svaki čas) po sljedećoj satnici, uz mogućnost da se 7. časovi, u izuzetnim slučajevima, u prvoj i drugoj smjeni ne realizuju zbog izuzetno visokih vrijednosti čestica štetnih po zdravlje - Preporuka svim poslodavcima da omoguće uposlenicima kasniji dolazak na posao, kako bi djecu/učenike nesmetano odvezli do predškolske ustanove/škole	- Osnovne i srednje škole, predškolske ustanove - Pravna lica	Ministarstvo za odgoj i obrazovanje Kantona Sarajevo	
3.	Organizovati online nastavu s ciljem rasterećenja kapaciteta javnog prevoza i gradskih saobraćajnica	Visokoškolske institucije	Ministarstvo za nauku, visoko obrazovanje i mlade Kantona Sarajevo	

4.	Privremeno zaustaviti sve tehnološke procese koji rezultiraju emisijama prašine u zrak gdje je to tehnički izvodivo, odnosno ako tehnološki procesi omogućavaju zaustavljanje. U slučaju da zbog karakteristika tehnološkog procesa nije moguće njihovo potpuno zaustavljanje, iste je potrebno svesti na tehnički minimum.	Operatori emisija iz tehnoloških procesa	Kantonalna uprava za inspektijske poslove Kantona Sarajevo - inspekcija zaštite okoliša	
5.	Maksimalno povećati kapacitete sredstava javnog gradskog prevoza koji ne zagađuju okoliš	- Kantonalno javno komunalno preduzeće "GRAS" d.o.o. Sarajevo Centrotans d.o.o.	Ministarstvo saobraćaja Kantona Sarajevo	
6.	Obezbjediti besplatan prevoz ili subvencioniranje voznih karti	- Ministarstvo saobraćaja Kantona Sarajevo - Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo		Osiguranje dovoljno finansijskih sredstava u budžetu
7.	Organizovati online rad od kuće, zavisno od mogućnosti, s ciljem rasterećenja kapaciteta javnog prevoza i gradskih saobraćajnica	Pravna lica		

Tabela 8. Mjere/aktivnosti i odgovornosti primjene u slučaju epizode UZBUNA u cilju zaštite zdravlja stanovništva

R. br.	Mjera/aktivnost	Nosilac mjere/aktivnosti	Subjekti praćenja provođenja mjere/aktivnosti	Uslovi za provođenje mjere/aktivnosti
1.	Zabraniti javna okupljanja uključujući održavanje organizovanih sportskih i kulturnih aktivnosti na otvorenom u smislu Zakona o javnom okupljanju Kantona Sarajevo radi sprečavanja ugrožavanja zdravlja ljudi	Ministarstvo unutrašnjih poslova Kantona Sarajevo, na zahtjev Ministarstva zdravlja Kantona Sarajevo		
2.	Zabraniti sportske aktivnosti na otvorenom prostoru u smislu Zakona o sportu Kantona Sarajevo radi sprečavanja ugrožavanja ili pogoršanja zdravlja sportista	Pravna lica (organizacije u sportu)	Kantonalna uprava za inspektijske poslove Kantona Sarajevo - inspekcija za sport	

3. INFORMISANJE JAVNOSTI

Služba za protokol i press Kantona Sarajevo dužna je da, u slučaju proglašenja epizoda, putem web stranice, sredstava javnog informisanja i drugih raspoloživih mogućnosti:

- izdaje saopćenja za sredstva javnog informisanja i građane, koja se odnose na stanje kvaliteta zraka i primjenu Plana,
- daje informacije koje razmatra Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo i Vlada Kantona Sarajevo vezane za primjenu Plana.

Javna ustanova Zavod za javno zdravstvo Kantona Sarajevo, u cilju zaštite zdravlja ljudi, je dužan da:

- u slučaju prekoračenja koncentracija zagađujućih materija u zraku o kojoj se obavještava javnost ili koncentracija pojedine zagađujuće materije opasne po zdravlje ljudi, vrši obavještavanje javnosti putem radija, televizije, dnevnih novina, interneta i/ili na drugi način,
- izdaje preporuke za stanovništvo u slučajevima prekomjerne zagađenosti zraka u Kantonu Sarajevo,

Operativni telefoni za prijave u vezi sa provođenjem ovog Plana su: Eko-telefon broj 033/66 00 00 ili telefon Kantonalnog operativnog centra civilne zaštite broj 121.

VII. NADZOR

Nadzor nad provođenjem mjera utvrđenih u ovom planu vrše Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo i ostala resorna ministarstva Kantona, Kantonalna uprava za inspektijske poslove Kantona Sarajevo (inspekcija zaštite okoliša, urbanističko-građevinska, komunalna, saobraćajna, tržišna i tehnička inspekcija, inspekcija za sport, inspekcija zaštite na radu), inspekcija zaštite od požara, općinske urbanističko-građevinske i komunalne inspekcije. Nadzor vrše i komunalni redari u okviru djelatnosti koje se odnose na provođenje mjera prevencije i ograničenja emisije u saradnji sa Kantonalom upravom za inspektijske poslove Kantona Sarajevo.

Kompletan Izvještaj o provedenom inspektijskom nadzoru tokom primjene Plana se dostavlja Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo najkasnije do 30.04. tekuće godine.

VIII. KAZNE NE ODREDBE

Pravna i fizička lica koja se ne budu pridržavala mjera propisanih ovim planom, podliježu sankcijama, kako je to utvrđeno odredbama Zakona o zaštiti zraka ("Službene novine Federacije BiH", broj: 72/24) i važeće Odluke o zaštiti i poboljšanju kvaliteta zraka u Kantonu Sarajevo.

IX. TROŠKOVI

Troškove ovog plana snose subjekti zaduženi za njegovo provođenje, osim ako Planom nije drukčije utvrđeno.

X. PRELAZNE I ZAVRŠNE ODREDBE

Stupanjem na snagu ovog plana prestaje da važi Plan interventnih mjera u slučajevima prekomjerne zagađenosti zraka u Kantonu Sarajevo ("Službene novine Kantona Sarajevo", broj 49/23 i 50/23 - Ispravka).

Ovaj plan stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-56218-5.1/25
11. decembra 2025. godine
Sarajevo

Po ovlaštenju premijera
Ministrica
Darja Softić Kadenić, s. r.

